

Candela mester a cuminza den garage pa motibo desconoci

Incendio na Zepp Wever

a presenta hopi peligro

Gasnan peligroso a amenaza y explosion ta worde investiga

ORANJESTAD(AAN)--

E causa a keda desconoci te cu ayertardi. Pero un cos a worde estableci for di promer momento cu vlamanan rapidamente a destrui e edificio: peligro enorme tabata presente. Peligro, cu tabata amenaza otro edificionan den Caya Grandi. Peligro, forma pa gasnan cu tabata scapa for di e deposito di Botica. Peligro, representa den e explosionnan cu a worde scucha y cu ta worde investiga. Tur cos ta indica, cu e incendio a cuminza den e garage.

Zepp Wever ta conoci como un homber generoso, cu na varios ocasion a sa di demostra cu e ta ciudadano na promer lugar y despues negociante. Pa

Zepp Wever placa tin un significacion limita, manera el a demostra na ocasionnan cu personanan den problema pa paga un entierro, a acudi cerca su persona. Aunke no tur hende por a comprende Zepp Wever semper, ayera tur hende a comparti e dolor pa mira Agencia Funeraria la Hoja bay perdi den candela. Candela ayeramadrua a come trabay duro y a laga ruina atras. Afortunadamente Zepp Wever por a scapa su refresheria, cu a bira un di e skinanan mas conoci di Nassaustraat.

Desastre a bati na porta ayeramadrua, ora informe a drenta cu e edificio cu ta acomoda La Hoja di Zepp

Wever ta na candela.

Tabata trata di un caso cu tabata tan grandi, cu Cuerpo di Bombero a considera oportuno pa convoca un rueda di prensa pa splica kico a socede.

Director di Cuerpo di Bombero, Juan Lopez, a bisa, cu tabata pa mas o menos 1.39 or, cu Central di Polis a worde notifica cu e edificio ta na candela. Inmediatamente a drenta den accion. E promer vehiculo cu a yega na e sitio, a conclui cu e candela, den corto tempo a plama y cu otro edificionan tambe tabata na peligro.

Sabiendo cu na e sitio e lo haya seguramente 3 Mil litro di awa pa minuut, Brandmeester a dicidi di habri e poz na altura di

Refresheria Ingrid.

Mientras Cuerpo di Bombero tabata lucha cu alma y curpa pa salba na promer lugar e edificionan den vecindario, por a scucha explosionnan. Ta investigando e causa di esaki y tin indicacion cu por tabata boternan di alcohol o quimico cu ta worde usa pa e empresa.

Cuerpo di Bombero a worde confronta cu otro problema. Na cierto momento un gas a cuminza scapa pero ningun hende tabata na altura di ki tipo di gas tabata trata. Nan a haya porfin un lista di contenido di deposito di Botica Oduber y por a tuma nota di diferente quimico cu tabata presente na e sitio.

Ta worde calcula cu prob-


ablemente Zwavelzuur tambe a scapa den e incendio y cu esaki por a provoca problema cerca bomberonan, cu a haya nan

confronta cu molestia ora nan a enhal a gasnan. Huma blanco mientrastanto, tabata penetra den wowo di e bomberonan, cu a haya iritacion na wowo.


E Director di Cuerpo di Bombero a muestra ariba tur peligro cu tabata presente ayeramadrua, ora na varios instante tabata tin falta di informacion. Asina tabata tin boternan di gas y ningun hende por a bisa si nan tabata yen si o no.

Ing. Juan Lopez a apunta cu afortunadamente e vehiculonan pa transporta morto y e pick up cu tabata den e garage no a rebenta. Si esey a socede, e edificio lo a basha abau.

Mientras cu causa di e incendio no por a worde estableci di biaha, tur cos tabata indica cu el a cuminza den garage y despues a plama pa otro partinan.



Den baki un miembro di Bombero ta ataca e vlamnan den laira....



Mientras miembro di Cuerpo di Polis ta yuda, un miembro di Cuerpo di Bombero a subi ariba un transformator pa combati candela.....